



## **“MEMBACA KE ARAH MEMBENTUK IMAN DAN TAKWA”**

الْحَمْدُ لِلَّهِ الْقَائِلِ: ... قُلْ هَلْ يَسْتَوِي الَّذِينَ يَعْلَمُونَ  
وَالَّذِينَ لَا يَعْلَمُونَ إِنَّمَا يَتَذَكَّرُ أُولُوا الْأَلْبَابِ ﴿٩﴾  
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ  
وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّهُمَّ صَلِّ  
وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ  
أَجْمَعِينَ. أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ،  
أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ  
اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تَقَاتِهِ  
وَلَا تَمُوتُنَّ إِلَّا وَأَنْتُمْ مُسْلِمُونَ.

**Sidang Jumaat yang dirahmati Allah.**

Saya berpesan buat diri saya dan tuan-tuan sekalian. Marilah kita bertaqwa kepada Allah SWT dengan melaksanakan segala suruhan-Nya dan menjauhi segala larangan-Nya.



Khutbah pada hari ini amat mendorong kita supaya memahami bahawa  
**"MEMBACA KE ARAH MEMBENTUK IMAN DAN TAKWA"**

**Sidang Jumaat sekalian,**

Kalimah yang pertama yang diturunkan melalui wahyu-Nya kepada Nabi Muhammad SAW adalah perintah untuk kita membaca. Turunnya perintah tersebut pastilah disertai dengan 1001 rahsia dan hikmah. Menurut Khalifah al-Makmun, membaca merupakan temasya dan pengembaraan menelusuri akal fikiran para tokoh dan pahlawan. Malah, membaca merupakan kunci untuk memahami tentang kejadian alam ciptaan Allah.

Dengan membaca juga, ia membantu usaha menghapuskan kejahilan. Ketika pasca perang Badar, Rasulullah SAW meminta tawanan musyrik yang ingin menebus dirinya agar mengajar cara membaca dan menulis kepada sepuluh orang muslim. Jelas, kuasa ilmu bermula dengan aktiviti membaca.

**Sidang Jumaat yang dirahmati Allah SWT,**

Membaca mampu membentuk peradaban manusia. Ia jelas sebagaimana penubuhan Baitul Hikmah pada zaman Abbasiyah yang memartabatkan keilmuan dan peradaban tamadun Islam. Aktiviti penterjemahan, dan pelbagai kegiatan ilmu yang didasari oleh budaya membaca serta mengkaji menjadi asas yang kukuh kepada kewujudan Baitul Hikmah.

Umat Islam kini perlu bangkit dan mengulangi kegemilangan sejarah dan kemajuan masa lalu, dengan kembali memugar semangat iqra'. Ia harus bermula daripada kepimpinan yang sangat menitik beratkan budaya keilmuan.

Al-Farabi berpendapat bahawa ketua Negara mestilah bersifat muhibban li al-'ilm (menyintai ilmu). Pembinaan generasi pencinta ilmu harus dijadikan



agenda bukan sahaja pemimpin, tetapi setiap individu kerana itulah bekal sepanjang jalan untuk memartabatkan Islam.

### **Sidang Jumaat sekalian,**

Pernahkah kita berasa gelisah pada awal pagi hanya kerana belum membaca berita utama di dada akhbar harian? Pernahkah kita rasa gelisah kerana hanya belum berkesempatan membaca kiriman pesanan ringkas daripada teman-teman? Ataupun bahan-bahan ringan yang sepatutnya hanya membawa berita sensasi dan hiburan? Tetapi pernahkah kita berasa bersalah tatkala terlupa membaca al-Qur'an. Padahal al-Quran adalah kitab yang paling agung, yang boleh menggetarkan jiwa dan memandu kehidupan. Kitab suci yang padanya undang-undang kehidupan dan petunjuk kepada kebaikan. Membacanya sahajapun bakal diberikan ganjaran.

Hadis daripada Abdullah Bin Mas'ud RA bahawa Rasulullah SAW bersabda yang bermaksud:

*"Sesiapa yang membaca satu huruf dari kitab Allah, maka ia akan mendapat satu kebaikan. Kebaikan itu sendiri akan berlipat ganda menjadi sepuluh. Tidak aku katakan alif, lam, mim itu satu huruf, tetapi alif satu huruf, lam itu satu huruf dan mim satu huruf".*

*(Riwayat at-Tirmizi).*

Justeru, bacalah al-Qur'an kerana membaca al-Quran itu adalah terapi yang paling berkesan buat hati. Sesudah membacanya, perhalusilah maknanya. Dalamilah tafsiran dan renungilah sedalam-dalamnya apakah pesanan yang termaktub di dasarnya.



Sesudah itu, bacalah hadis rasulullah SAW kerana ia suatu warisan yang ditinggalkan baginda SAW. Hadis daripada Abu Hurairah RA bahawa Nabi Muhammad SAW bersabda yang bermaksud:

*"Aku tinggalkan dalam kalangan kamu dua perkara yang kamu tidak sekali-kali akan sesat selagi kamu berpegang teguh kepada keduanya, iaitu kitaballah dan sunah Rasulullah SAW".*

*(Riwayat Imam Malik).*

### **Sidang Jumaat sekalian,**

Sesungguhnya, membaca membuka pintu untuk kita memahami ilmu-ilmu agama. Malah, membaca ayat-ayat al-Qur'an dan hadis serta kitab-kitab ulama' membantu kita mendalami sesuatu bidang keilmuan. Allah berfirman dalam surah al-Baqarah ayat 17:

مَثَلُهُمْ كَمَثَلِ الَّذِي اسْتَوْقَدَ نَارًا فَلَمَّا أَضَاءَتْ مَا  
حَوْلَهُ، ذَهَبَ اللَّهُ بِنُورِهِمْ وَتَرَكَهُمْ فِي ظُلُمَاتٍ لَا  
يُبْصِرُونَ

*"Perbandingan hal mereka (golongan yang munafik itu) samalah seperti orang yang menyalakan api; apabila api itu menerangi sekelilingnya, (tiba-tiba) Allah hilangkan cahaya (yang menerangi) mereka, dan dibiarkannya mereka dalam gelap-gelita, tidak dapat melihat (sesuatu pun)".*

Sebagai kesimpulannya, amalan membaca ini boleh dikira sebagai ibadah sekiranya dimulai dengan niat kerana Allah. Malah, ia diganjar dengan pahala



berganda sekiranya apa yang dibaca dapat membantu kita mendalami ilmu-ilmu agama. Bacalah al-qur'an kerana ia memberikan ketenangan kepada hati-hati yang kusut. Dalamilah maknanya supaya kita mampu menyingkap pelbagai disiplin ilmu. Untuk itu saya berpesan kepada diri saya dan tuan-tuan untuk mengamalkan perkara berikut dalam kehidupan seharian kita.

Pertama: Bacalah al-Qur'an dan hadis Nabi SAW pada setiap masa. Berjihadlah bersungguh-sungguh untuk mempelajari, menghayati dan melaksanakan isi kandungannya dalam kehidupan seharian kita.

Kedua: Belanjakanlah sedikit peruntukkan daripada sumber kewangan kita untuk membeli bahan bacaan agama untuk meningkatkan kefahaman terhadap agama kita.

Ketiga: Ibu bapa perlu menggalakkan anak-anak untuk membaca bahan bacaan berfaedah, kerana merekalah diletakkan separuh harapan sebagai pejuang agama masa kini dan masa hadapan.

Keempat: Pihak masjid dan institusi masyarakat digalakkan menganjurkan program-program seperti bedah buku dan amat perlu diperhebatkan lagi kerana ia akan melahirkan masyarakat yang minat membaca.

Kelima: Pihak masjid, surau, balai raya dan rumah-rumah hendaklah mewujudkan pusat sumber mini untuk menggalakkan aktiviti membaca kepada seluruh ahli masyarakat.

أَعُوذُ بِاللَّهِ مِنَ الشَّيْطَانِ الرَّجِيمِ



الَّذِينَ ءَاتَيْنَاهُمُ الْكِتَابَ يَتْلُونَهُ حَقَّ تِلَاوَتِهِ ءُؤَلِّيكَ  
يُؤْمِنُونَ بِهِ ؕ وَمَن يَكْفُرْ بِهِ ؕ فَأُولَٰئِكَ هُمُ الْخَاسِرُونَ ﴿١٢١﴾

*"Orang-orang yang Kami berikan Kitab kepada mereka, sedang mereka membacanya dengan sebenar-benar bacaan (tidak mengubah dan memutarakan maksudnya), mereka itulah orang-orang yang beriman kepadanya; dan sesiapa yang mengingkarinya maka mereka itulah orang-orang yang rugi.*

*(Surah al-Baqarah : 121).*



بَارَكَ اللَّهُ لِي وَلَكُمْ بِالْقُرْآنِ الْعَظِيمِ،  
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ  
الْحَكِيمِ وَتَقَبَّلَ مِنِّي وَمِنْكُمْ تِلَاوَتُهُ، إِنَّهُ هُوَ  
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي  
وَلَكُمْ وَلِسَائِرِ الْمُسْلِمِينَ وَالْمُسْلِمَاتِ،  
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا  
شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.  
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ  
وَعَلَى آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى  
يَوْمِ الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ فَقَدْ  
فَازَ الْمُتَّقُونَ.

**Sidang Jumaat yang dirahmati Allah SWT,**

Mimbar Jumaat sekali lagi berpesan bahawa Islam mengajar umatnya supaya bersikap sederhana dalam segala amalan dan tindakan. Pada masa yang sama umat Islam disaran supaya menjauhi sebarang bentuk perbuatan ekstremis yang kesannya akan menjejaskan keharmonian, perpaduan, keselamatan ummah dan Negara. Tindakan ekstremis juga boleh memberikan tanggapan negatif terhadap kesucian dan kemuliaan agama islam. Sebaliknya seluruh umat islam amatlah dituntut agar menampilkan kemuliaan akhlak, sikap dan keperibadian tinggi sebagai muslim sejati agar





umum mengetahui bahawa Rasulullah SAW diutus dan Islam yang diperjuangkan adalah rahmat bagi seluruh umat dan sekalian alam.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا  
الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ  
صَلِّ وَسَلِّمْ عَلَى سَيِّدِ الْمُرْسَلِينَ وَارْضَ اللَّهُمَّ عَنْ  
أَصْحَابِهِ وَقَرَابَتِهِ وَأَزْوَاجِهِ وَذُرِّيَّاتِهِ أَجْمَعِينَ.  
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ ، إِنَّكَ  
سَمِيعٌ قَرِيبٌ مُجِيبُ الدَّعَوَاتِ يَا قَاضِيَ  
الْحَاجَاتِ. اللَّهُمَّ إِنَّا نَسْأَلُكَ وَنَتَوَسَّلُ إِلَيْكَ بِنَبِيِّكَ  
الْأَمِينِ، وَنَسْأَلُكَ بِأَسْمَائِكَ الْحُسْنَى وَصِفَاتِكَ  
الْعُظْمَى أَنْ تَحْفَظَ بَعِينَ عِنَايَتِكَ الرَّبَّانِيَّةِ وَبَحْفَظِ  
وَقَايَتِكَ الصِّمْدَانِيَّةِ، جَلَالَةَ مَلِكِنَا الْمُعَظَّمِ سُلْطَانَ



سَلَاغُور، سُلْطَان شَرْفُ الدِّينِ ادریس شاه  
الحاج ابن المرحوم سُلْطَان صَلَاحُ الدِّينِ عبد  
العزیز شاه الحاج. اَللّٰهُمَّ اَدِمِ الْعَوْنَ وَالْهَدَايَةَ  
وَالْتَّوْفِيقَ، وَالصِّحَّةَ وَالسَّلَامَةَ مِنْكَ، لَوْلِيَّ عَهْدِ  
سَلَاغُور، تَعَكَوْ اَمِيرِ شَاهِ ابْنِ السُّلْطَانِ شَرْفُ  
الدِّينِ ادریس شاه الحاج فِيْ اَمْنٍ وَصَلَاحٍ وَعَافِيَةٍ  
بِمَنَّكَ وَكَرَمِكَ يَا ذَا الْجَلَالِ وَالْاِكْرَامِ. اَللّٰهُمَّ اَطْلُ  
عُمَرَهُمَا مُصْلِحَيْنِ لِلْمُوظَّفَيْنِ وَالرَّعِيَّةِ وَالْبِلَادِ،  
وَبَلِّغْ مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkebakikan.

Justeru kami pohon kehadiran-Mu ya Allah, tetapkanlah iman kami, terimalah amalan kami, kukuhkanlah perpaduan kami, luaskanlah rezeki



kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engkau redhai, lindungilah kami daripada bala bencana dan ujian-Mu yang berat supaya dengan demikian, negeri kami akan sentiasa bertambah makmur dan berkat.

Ya Allah, kami pohon kehadiranmu, mantapkanlah pegangan kami menurut ajaran Ahli Sunnah Waljamaah dan peliharalah kami daripada amalan dan akidah yang menyeleweng dan sesat seperti fahaman Syiah, Qadyani serta lain-lain fahaman.

Ya Allah, bukannya hati kami untuk mendirikan solat fardhu lima waktu, menunaikan zakat dan kefarduan yang lain. Berkatilah hidup orang-orang yang melaksanakan zakat dan menyayangi fakir miskin serta mereka yang menginfakkan harta untuk Tabung Amanah Pembangunan Islam Selangor (TAPIS) dengan ganjaran pahala yang berkekalan hingga ke hari akhirat.

Demikian juga ya Allah, tambah dan luaskanlah rezeki orang yang mewakafkan hartanya, terimalah wakaf mereka dengan ganjaran pahala yang berkekalan hingga ke hari akhirat.

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ  
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا  
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. عِبَادَ  
اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي



الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ  
يُعْظِمُ لِعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ  
نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ  
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.